

راضي علي الطهطاوي

أخرك شويّة بُكا

أشعار بالعامية المصرية

الطبعة الأولى ٢٠١٩



راضي علي الطهطاوي

الكتاب

عنوان المؤلف : أخرج شوية بكا
المؤلف : راضي علي الطهطاوي
التصنيف : أشعار بالعامية المصرية
رقم الإيداع : ٢٠١٩/٩٥١٧
الترقيم الدولي :
عدد الصفحات : ١٠٠ صفحة
رقم الإصدار الداخلي : ٤٠٦
تاريخ الإصدار الداخلي : ٢٠١٩ ، طبعة أولى
تصميم الغلاف والتنسيق : الشاعرة منى الغريب

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب إلا بموافقة كتابية وموثقة من الشاعر

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



مؤسسة
النيل والفرات
للطباعة والنشر والتوزيع
أسسها الشاعر ناجى عبد المنعم
حزب ٢٠٠٧

رخصة مزاولة مهنة: 58365 - سجل تجاري: 13242 / 2017 - بطاقة ضريبية: 35-01-572
عضو عامل باتحاد الناشرين المصريين رقم 941 لسنة 2018
هاتف: 01011256943 - 01116202218 - 01202541192 - فاكس: 020554372901
النيل والفرات : nagyegy200064@gmail.com
alnilwaalfourat : alnilwaalfourat@gmail.com
[المقر الرئيسي: ج. ب. ر. ع. محافظة القاهرة - العائش من رمضان - مجاورة 13 - أمام ستر الد3 - 304

الإهداء

إلى: روح أبي " رحمه الله " .

وإلى أمي " حفظها الله " .

إلى: زوجتي وأبنائي..

إلى: أخوتي .. وأقاربي وأصدقائي..

إلى : زملائي ...ومعارفي وجيراني ..

إلى : أساتذتي ... وتلاميذي..

راضي علي الطهطاوي

عضو اتحاد كتاب مصر

محاضر مركزي بوزارة الثقافة

القصيدة العجيبة

نفسى أكتبك قصيدة

كل كلمة فيها بكر ** ليكى إنتي بس حكر
لمّا تنسيني حبيبتي ** تصبح التذكار وفكر
كل حرف بألف معنى ** وزن . كلمة . عزف . معنى
لو قراها حد غيرك ** راح تصيبه ألف لعنة
فى الجمال ماليتها زى ** كل نقطة تشع ضيّ
لو قراها حد ميّت ** نبضه يرجع تاني حيّ
دون حروف الأبجدية ** ليكي إنتي تكون هدية
لمّا تقرّيها حبيبتي ** تطرح الأزهار ندية
نفسى أكتبك قصيدة

تملا كل حياتنا بهجة ** تنقري بميت ألف لهجة
لو في مرّة الشمس غابت ** تبقى نور بيشع وهجة
تغني عن كل الكلام ** تنقري من غير علام
لمّا تقرّاها شفايفك ** تمحى م الدنيا الألام
بشكل تانى ولون جديد ** ع الورق ينبض وريد
من حرارتها يا روحى ** تمحي م الدنيا الجليد
بالطاسم والإشارة ** تجلب الفرحة وبشارة



أحرك شوية بكّا

لو قراها حد غيرك ** الرموز تصبح نشارة

نفسى أكتبك قصيدة

تنقري ف كل اتجاة ** تبقى مركب . طوق نجاة

اللي يقرأها بهدوووء ** يملك منصب وجاه

بالذهب عنبر وطيب ** لو قراها مريض يطيب

حتى لو إبليس سمعها ** يبقى واعظ أو خطيب

لمّا تقريها تغني ** والنجوم ترقص بفني

والكلام منك يضيع ** لو بعدتي ف مرة عني

تكتب فوق الحيطان ** من جفاف تروى الغيطان

لو قراها أي حاسد ** ينحرق زي الشيطان

نفسى أكتبك قصيدة

فيها إبداع وابتكار ** تبقى للعشق احتكار

ماكتبها أي شاعر ** مهما قالوا ابن كار

خالية من كل العيوب ** تملأ بالرزق الجيوب

لو قراها لص سارق ** ينكسف منها ويتوب

يلقوها ع البيان ** تنزل منها التبيان

لو قروها ف أي حة ** كل شئ تايه بيان

ما كتبها قيس في ليلته ** ولاً عنتر لجل عيلته

لو جمل خطي عليها ** راح تخفف عنه شيلته



نفسى أكتبك قصيدة

تملا ريحة الكون عبير ** سرَّها يفضل فى بير
سرَّها بالحبر غامض ** لو جابولها ميت خبير
منها نار غيرتك تهب ** قلب لو مكسور يحب
لو لمسها فرع ناشف ** تلقى خُصرة فيه تشب
فوق حرير أبيض يشف ** كالنجوم بتدور ..تلف
لو ف يوم منك تضيع ** البحار تفضى وتجف
تمسح الدمع وبكاكى ** ننبهر منها لحكاكى
لو قراها الديك يبيض ** والأسود ترقص .. تكاكى

نفسى أكتبك قصيدة

تخلى طول الكون دا عرض ** والسما تحسد فى أرض
لو قراها مين مقصّر ** عمر يوم ما يسيبه فرض
تبقى قصة وأحلى سيرة ** تمحى شك وكل حيرة
رَبّة الأشعار بذاتها ** لو قررتها تموت بغيره
كل كلمة بألف نصّ ** قلبى بيها ليكى خَص
اللى أعمى راح يشوف ** لو بعينه ليها بص
منها قلبك راح يحنّ ** لو قراها مرة جن
يمشى خايف تحت حيط ** ويهدا فوراً يستكن

.....



الصعيدى

صعيدى بعبايه وشال ** صوته يهز جبال
شوفت الجمال ف عينيه ** قلبى انهبد وانشال
عايق ولابس عمه ** منها يغير لعقال
بارم شنابه يا ناس ** مفتول كما لحبال
حامى الطباع والدم ** تلمس كرامته محال
يخشى الملام والعيب ** ولا يمشى فى سكه شمال
يحفر يا ناس ف الصخر ** عمره ما كان تنبال
قانع عفيف النفس ** ويعيش بلقمة حلال
واخذ الشهامة ميراث ** ابن الأصول والعال
هيبة وعنده كبير ** يرفع العموم والخال
كلمة يقولها خلاص ** تُصدق معاه لفعال
لو غربه يوم ترميه ** سادد وزينة رجال
بيصون ويرعى بلاده ** ولا يعرف مياصة الحال
ولا راسم يا ناس تاتوه ** ولا لابس كمان سلسال
خشنه ايديه م الشغل ** زايد سماره جمال
راجل ومالى هُدومه ** وانا قلبى عشقه ومال

.....

الطالب الفاشل

أنا بانسى الواجب وكتابي ** وهروبي بيكثر وغيابي
ونتيجتي بتطلع أصفار ** ومصيبه هترقص على بابي
أنا بابا بيدفع مصاريفي ** والعب واتدلّع على كفي
واضحك على خيبتي ف اللجنه ** واكتب بمزاجي وتخاريفي
أنا نايم صاحي عشان أكلي ** مكياجى ولبسى أنا وشكلي
وبابا يقوللى مافيش فايده ** واحتارت ماما في مشاكلي
مش فاضي على طول في النادي ** أعصابي بارده وشئ عادي
وبارفع ضغط بتاع ماما ** وهاجنن برضه كمان دادي
مش حاطط انا علم ف بالي ** ولا عمي عاجبني ولا خالي
ومصاحب شله خربانه ** وبتندب ماما من حالي
مرتاح ع الآخر في حياتي ** فلوسي دروسي وطلباتي
وبابا حارق أنا ف دمه ** وماما بتصرخ وتهاتي
نايم على نفسي وباشخر ** باوصل مدرستي متأخر
وبضايق دايمًا استاذي ** مستقبل حلمي بيتبخر

..

وف السلوك آخر غتاته ** مش بذاكر أي داتا
مهما استاذي بيشرح ** مخي جزمه نوعها باتا

لَمَّا مَخِي يَقُومُ يَفْذُ ** الْكِتَابُ شَيْءٌ مُسْتَفْزُ
الْمَذَاكِرَةِ مَشْهُوَائِي ** وَبِالْكَسْلِ أَنَا مُسْتَلْذُ
أَنَا بِاعْشَقُ نَوْمِي وَبِطَائِفِي ** عَلَى رَاسِي شَائِلٌ مِنْ طِينِي
وَنَتِيجَتِي بِتَطْلُعِ أَصْفَارِ ** أَصْرُخُ يَا أَبَا وَغُطِينِي

.....

ماكياجها أوفر

البنّت الماكياجها الأوفر
ميك أب دا اووفر غاشّاني
بودرة وتجليخ زى قيشاني
والوش دا علبة ألوان
تلمع وبتبرق راوشاني
وفلوسها ضايعة ف كوافيرها
تخلع وتركبّ ضوافرها
تفتح بالفالج أسنانها
وشويه هاتمشي بحوافرها
تشفط ف دهونها وبتخن
للجسم تبرّد وتسخن
وحرارة الشمس إن يوم زادت
تلقاها كفحمة وهاتدخن
وستايلى ياناس أنا من صغري
سيليكون وموديل دا شئ مغري
تلقاها ياناس كدا كالبوصة
أجمل لو تمشى يا ناس دوغري
أحرك شوية بكا

مدهون الوش وملتيف
 أى لاينر شادووا وملتيف
 بانكيك وزايد عن حده
 دا صناعي جمالها ومنتزيف
 ماكياجك متبالغ فيه
 إيه ناقصك بس هتخفيه؟!
 من أول غسلة وهتبانى
 جوزك ينفيكى وتنفيه
 قرعة وباروكتها بميت فورمة
 قالاووظ رقيبها ماهيش بورمة
 ليه عاملة بس كدا ف نفسك؟!
 مانيكان يا اخواتي دى مش حُرمة
 منخارها تطوّل وتَقْصُر
 تنفخ وتنفش وبتعَصّر
 فبلاش يا عريس تبقى ضحية
 لازم تتروى وتتبَصّر
 كوريكتور لحبوب بتنبّت
 كونسيلر ياما دارت خبّت
 طاب وشك يتحمل إيه؟!

وبرايمر محتاج لمثبّت
لينسز والماسك الترقيعي
والباودر أصفر وربيعي
فبلاش الغش المستورد
يا حلاوة الوش اللي طبيعي

.....

أخرك شوية بُكا

ليلة عزا

يادوب يومين تتنسى

ويمكن يكونوا أقل

واللى سندته كثير

جايز ما يبكى عليك

ولا عينه راح تتبل

هتتموت وايه يجرا

يعنى الجليد هيدوب

ولا صبح يبقى غروب

ولا صرخة من غيمة

ولا دنيا راح تختل

واحد وزى الناس

عدا يا دوبك فات

بعد الغرور والجاه

عضمك هيبقى رفات

واللحم داب وانحل

مهما تعيش لقرون

ورصيد يعدي قارون
مالك جبال الذهب
وياقوت بألفين تل
كله هيعمل ايه
وقت الممات لو حل
بالطول تعيش والعرض
ولا حد فيه غيرك
ناسي الوجوب والفرض
شادد خطوط سيرك
جالك يا واد الموت
والصحة فيك والصوت
وقت الحياة انتهى
راس الكبير تتدل
مع لحظة التغسيل
والجسم ف استسلام
يا حليوة يا فتوة
مَيَّه عليك بتسيل
خلص الرصيد وكلام
لا حيل ولا قوة

يقين مافيش تمثيل
حسرة وندم وملام
مربوط وجوه الكفن
خارج بلا رجعة
نجم الليالى أفل
لحظة خروج النعش
يعلا الصراخ وارتفع
لا المال يحوش عنك
ولا منصبك يوم نفع
مهما المعارف ليك
باب الوساطة قفل
أخرك شوية بُكا
ليلة عزا
يادوب يومين تتنسى
ويمكن يكونوا أقل
.....

فينك حبيبي ؟!

فينك حبيبي ؟! ** قَرَب شويه
المس ايدياً ** بُص ف عينيّه
شوفها يا روعي ** بتقولك ايه
عينيّا فيها كتير كلام
وعتاب محبه ** وفيه ملام
إزاي بتقدر ** تبعد وتهجر
وازاي بتنسى ** وتروح وتقسى
وازاي بتمشي ** ولا ناوي تغدر؟!
من غير سلام ** وقلبي اللي حبك
ولا حتى مرّه ** تسأل عليه
قَرَب يا روعي ** تعالى جنبي
عشان عشقتك ** دا يبقى ذنبي ؟!
قَرَب حبيبي ** واسمع غنايا
قربك هنايا ** ضحكة غنايا
قَرَب تعالى ** قلبي اللي حبك
صعبان عليه
حبك وسبته ** يمشي وحيد

أخرك شوية بكا

شاري وبعته ** وتهرب بعيد
خليتني احبك ** وقلبك حديد
لما انت بايع ** خليتني احبك
طاب قوللي ليه؟؟!!
فينك حبيبي؟! ** قرب شويه
المس ايدياً ** بـُص ف عينيّه
شوفها يا روعي ** بتقولك ايه

.....

اليتيم

اليتيم حقه علينا ** إني نرعاه ونداديه
يلقى حضن الكون دا دافي ** يبقى عار لو بنعاديه
ساعة دنيا تضيق عليه ** وليه يا ضحكة تعانديه؟!
زي طير مكسور جناح ** راح يعيش لو هناعديه
قلب محتاج إيد تطبطب ** تمسح دموع من فوق خاديه
حد يسأل عن ظروفه ** ف العشية ومن غاديه
نرسم الفرحة ف طريقه ** بالمحبة ونهاديه
اليتيم محتاج رعايه ** وصوت مَحَنَّة بيناديه
زي ورد يا ناس ببديل ** الأسى جفف واديه
مرة بيعوز للنصيحة ** أي مسلك يهتديه؟!
نفسه يلقي كلمة حلوة ** ولأ هندام يرتديه
ولأ حيط يسند ف ظهره ** أو رغيف يشبع زاديه
هو يعني اليتيم ذنبه؟! ** يا قلوب ليه تبعديه؟!
بكره يكبر فرحه يطرح ** عمر تاني يبتديه
وزي ما خد خير هيدي ** واللي شافه يقتديه
اليتيم حقه علينا ** إني نرعاه ونداديه

.....

كنت مغفل

كنت مغفل .. كنت عبيط

لَمَّا رسمت الحلم بتاعي

فوق شخابيط

لَمَّا طلبت ف مرة أغني

من غير نوته

وكان العزف نشاز بيزيط

لَمَّا نزلت النهر لوحدني

من غير مركب

فجأة لقيت النهر محيط

كنت عبيط

أصحي وابات

جمع وطرح مع الحسابات

أس مركب .. أس معقد

بس اللعبة أساسها بسيط

كنت عبيط .. كنت مغفل

لَمَّا المخ معاي اتقفّل

لَمَّا رسمت الحلم بتاعي فوق شخابيط

باحب الدراسة يا ماما

كل الدراسة بحبها ** إلا تمارين الحساب
وساعات علوم يستغله ** والفيزيا بتجيلي اكتاب
جغرافية تخنقني بحرارة ** والكيميا زفت مع الهباب
ولاً التاريخ والرغي فيه ** والسيرة والغيبة وعتاب
طاب لو هنحكي عن اللغة ** بافرح كتير لو مسيو غاب
منطق وحصة فلسفة ** بالسلب مرة وبالإيجاب
والنحو إيه جنب النصوص ** مبطيقتش شكله ف الكتاب
لو شوفت أستاذ بالعصاية ** م الرعب شعري لونه شاب
يدخل مكشـرر ليه كده؟! ** م الخوف ورهبة تقول عذاب
دا "الميس" لما بتبتسم ** بافرح وبفهم بانعجاب
بس أحلى حاجة الإنجلش ** مكشوفله عن قلبي الحجاب
والفسحة برضه بحبها ** وخصوصي لو فتحولنا باب
والرسم واللعب وموسيقى ** مغرم هواية وقلبي داب
شفتي الحكاية معايا إيه ** وعشان كده ابنك دا خاب

.....

البنّت الأمورة الحلوة

لَمّا عدت قدامي وفاتت
صحّت جوايا حاجات ماتت
والقلب بيصرخ باللهفة
والمخ الثاني راح شاتت
البنّت الأمورة الحلوة
على واحدة ونص بتتمايل
والجسم يا ناس زييق سايل
إزاي أنا قلبي هيتحمل؟!
والضحكة عملتلي عمايل
البنّت الأمورة الحلوة
بتحط الكحلة بحواجبها
ومحدث ف الحتة دي عاجبها
والكل بيتمنى البصة
لو تنده ع النجمة تجيبها
البنّت الأمورة الحلوة
بيبان من خطوتها العز
هانم لا بتجري ولا تهز

لو تاجر لفراخ يوم شافها
هيقول ع الفروجة دي وز
البنـت الأمـورة الحلوة
بترش بطلعتها البهجة
كالشمس ان بانـت ليها وهجة
والشهد يدوب بين شفايفها
وعيونها بتنطق ميت لهجة
البنـت الأمـورة الحلوة
تعدي وليها يا ناس زهوة
لوجات ف الشارع على سهوة
الحتة ما تسمع فيها صوت
والناس بتقوم من ع القهوة
البنـت الأمـورة الحلوة
شيכולاته وفستق ومراـمل
التكتك يقفش بفراـمل
لوشافها هينـدب كالناس
والكل يقول دا احنا أراـمل

.....

لو نويت

لو نويت

ف يوم تسيبني

مش هيبقى عندي فارق

يعني ايه لو سهم مارق

ياللا روح في ألف داهيه

و خد وراك الباب وغور

كل ذكرى معاك هاشيلها

وفرحتي بعدك ماشيلها

واحلى منك ألف غيرك

ضحكتي مش راح تبور

الغرام مايكونش عافية

من قلوب تهجر وجافية

المحبة عشق صادق

مش كلام مليون فتور

مستحيل ف يوم هحایل

طول ماضلك حيطه مايل

دا اللي زيك عينه زايغة

وماشي بتالف تدور
قلبي راح ينسأك بسرعة
مش هيضرب حظ قرعة
ومش هتفرق هيا عندي
أصله واخد ع الكسور
أنت فاكرك لو تبيع
عمري بعدك راح يضيع
كله دا وهم ف خيالك
لسه فيك طبع الغرور
عمري ما ازعل من قراك
بس بعدي دوق مرارك
دا اللي زيك منه يامه
و الدرر ماليه البحور
يعني لو نجمك يغيب
قلبي فاكركه راح يخيب!!
اللي شبعان م الجواهر
امتى يزعل ع القشور؟!

.....

إنّتي لوحديك

إنّتي لوحديك

من دون كل بنات الكون
قلبي بيلقى معاكى سكون
واللي صورتها بلوني اترسمت
روحي وروحها بذرة اتقسمت
نظرة عشق ما بيني وبينها
شوفت الضحكة اللامعة ف عينها
خلت كل القصة اتحسمت
ونسيت كل مآسى الناس
وشفت الدنيا بلونها البمبي
وجنبى سمعت أغاني الليل
بتنده ليّا..تشد الحيل
وامّا انتشق ع الحنيّة
تمد إيديها وتملا الكاس
ورغم حياتي دي كانت عتمة
شوفت الدنيا بألوان كاتمة
كنت أنا باسمع صوت همساتك

بيشجعني

يا ما شعرت كثير لمسائك

لمّا تطبّط وتودعني

شوفت البدر بلون ونّاس

ولمّا بشوف الضحكة بتاعتك

بلقى العالم كله حنون

إنّتي لوحدك

اللي جمالك شئ متميز

قلبي بقلب شعور متحيز

اللي قدرتي تحطي البصمة

تمحي دموع جواي متخاصمة

إنّتي قدرتي

رغم العمر المُر ال dirty

تخلي بذور الحب تنبّت

دبّت فيا بسرعة الروح

بعد ما داقت شجر الحزن

ويأس وعبّت

إنّتي لوحدك

اللي جمالك فاق الحد

لجلك لكل طريق يتمد
اللي مَحيتي كل جروحي
اللي قدرتي يا ناس تداويني
وبقيت أعزف على دواويني
بعد ما كل مشاعري اتخبَّت
إنتي لوحديك
اللي شغلتي البال والفكر
وقلبي يبجري عليكى بجذب
اللي ملكتي القلب بحكر
ونهر حنانك سكر عذب
اللي هزمتي معايا هزيمتي
اللي رفعتي بكلمة عزيمتي
إنتي لوحديك .. وحدك بس
كان الخوف جواي يتحس
وقت الزنقة ... وعوزة و خنقة
لحظة ضعف معايا شديدة
شايف كل الخلق بعيدة
رفعتي ف شيلتي
سندتي ف ميلتي

و بين الموجه
ف بحر التوهة
بدعوة قلبك
كانت ليا طوق ونجاة
ماسك فيها بقوة متببت
إنتي لوحديك
.....

دنيا بلاستيك

إيه الدنيا دي غير أستيك !؟
مرّة حديد ومرّة plastic
مرّة تشد معاك وتكشر
وساعات تبقى معاك fantastic
دنيا غريبه بألفين لون
تنفخ مره نفش balloon
مرّة تخليك ويّا حبايبك
مرّة تسيبك تبقى alone
دنيا وحالها ياسيدي عجيب
سرف بيرها وبحرها deep
مرّة تخليك فرحان تضحك
وساعات قلبك يصرخ weep
إيه الدنيا دي غير ball !؟
مهما ها تعلّ لازم fall
إياك لحظة ضعفك تيأس
ف أصعب لحظه بيحي ال goal
دنيا سواقي طالع نازل

مرّة تكشّر مرّة تغازل
زَي الموج ف بحرهِ الهايج
ساعه بتقسي وساعه مهازل
دنيا مراوح بينا تلف
زَي التسجيل لما يسف
يعلا ويوطي زيّطه ودوشه
يخلي المخ معانا يخف
آه - آه - أووه - أووه
إيه الدنيا دي غير show!؟
والجمهور قاعده يتفرج
حظك يجي وساعات go
تديك لمّا تكون مش عايز
تطلب أنت تقولك no
أصل الدنيا ديه افشك
زَي البنت برمشها wink
مرّة تقولك انت حبيبي
ومرّة تخلي حياتك ink
هيلا هوب هيلا هوب
أوعى ف بحر اليأس drop

سيب الحلم يعدي يفوت
 إياك حلمك يجي stop
 ايه الدنيا دي غير book !؟
 مهما تقرا فيه وت look
 ساعه تبقى معنا smooth
 وساعه تلاقي طريقها block
 ماشيه الدنيا تاك توك تيك
 مرّة بعافيه وساعات sick
 وتكون قشطه ويّا حلاوه
 وساعات تلعب بينا trick
 مهما تكون ف الدنيا دي high
 منفوخ ماشي تقول I – I
 أنت يادوبك واحد عادي
 بكره يموت ويقول bye- bye

.....

اللي اتعود يضحك

اللي اتعود يضحك دايمًا
صعب حقيقي يعيش مهزوم
أصل الضحكه دي مفتاح سر
يقتل وجع الخوف جوانا
ويمسح كل هموم
أصل الضحكه دي بلسم يروي
عيون عطشانه
يخلي عزيمةك فيك تتشد
أصل الضحكه دي بدر بيلمع
يمنع حبل شجن يتمد
يخلي حلاوة الوش تدوم
اللي اتعود يضحك
يفضل زي الطير بيغرد
مهما يكون مأزوم
مهما الحزن يدوس على قلبه
يرفض إنه

ف يوم يستسلم

أخرك شوية بكا

يضحك ** يضحك

ويقدر ثاني يقوم

اللي اتعود يضحك ...دائماً

صعب حقيقي يعيش مهزوم

.....

نتحمل عشان مصر

عشان مشوارنا نتحمّل ** دي مصر يا ناس بتتجمل

بحبة صبر معانا نعدي ** وبكره نلاقي الحلم اتكمل

بنصلح من خطة سيرنا

وشوفوا الجهد ازاي مبذول

وهنفرح نشبع من خيرنا

والشدة مؤكد هتزول

لو حمل معقد وشديد ** ومهما علاجنا مؤكد مر

بالعزم وايدنا ف الإيد ** الضيقة دي فعلا هتمر

عشان مشوارنا نتحمّل ** دي مصر يا ناس بتتجمل

بحبة صبر معانا نعدي ** وبكره نلاقي الحلم اتكمل

دا الإصلاح محتاج لعزيمة

والخطوات ضرورية ولازمة

لو نهرب هنعيش في هزيمة

ومشاكل تكثر مع أزمة

عشان مشوارنا نتحمّل ** دي مصر يا ناس بتتجمل

بحبة صبر معانا نعدي ** وبكره نلاقي الحلم اتكمل

.....

أخرك شوية بكا

واتقابلنا

واتقابلنا يا حبيبي ** بعد طول هجر وغياب

لَمَّا شوفتك يا حبيبي

صُدفة من بعد السنين ** قلبي زاد النبض فيه

ياما عاش بعدك أنين ** وكل شوق كان بيداريه

وقال دي ذكرى وماضي غاب

واتقابلنا يا حبيبي ** بعد طول هجر وغياب

لَمَّا شوفتك يا حبيبي

افتكرت الماضي تاني

زي ما يكون لسه أمس

ياما عشت كتير بعاني

وكنت بندهلك بهمس ** والندم يصحى وعتاب

لَمَّا شوفتك يا حبيبي ** العرق على وشي سال

ولقيت عيوني مبرّقين ** ياما قلنا فراق محال

عشنا فيه متفرّقين ** ودوقنا ف البعد العذاب

واتقابلنا يا حبيبي ** بعد طول هجر وغياب

.....

حلم السنين

يا حلم السنين اللي انكسف

ما بين ضلام وسكون

ضي النهار لمّا انكشف

نورّ ببهجة الكون

يا حلم السنين المختشي

بين الغيوم والدمع

افرد جناحك وانتشي

ليلك ينورّ شمع

يا حلم حاضن ف الأمل

امسك علالي ف السما

العزم فيك لمّا اكتمل

ورد الربيع زهره نما

يا حلم لسه الكون فسيح

افرد جناحك طول وعرض

التلج لو يجري ويسيح

يمنع جفاف من وش أرض

إياك يا حلم ف يوم تتوه

أخرك شوية بكا

إياك يجيلك طيف كلل
دا الحزن يطرح ع الوجوه
وحياتنا راح تصبح ملل
يا حلم صورتك ع الورق
ألوان بتملا ألف بير
لو سهم منك يوم مرق
جعبتك فيها الكثير
يا حلم السنين المغترب
مالك كدا ناسي الدروب؟!
امتى هتيجي وتقترب؟!
ولا احتواك لحن الغروب?!

.....

نصيحة محبة

حب أهلك مش هاتهلك *** حزن آمن لو تميل
طير وسافر روح وعافر ** تلقى الحب دا خيره ظليل
حب دارك عين في جارك ** ابقى مخلص عيش أصيل
خلي اللهجة فرحة وبهجة ** تقوى المولى أحلى دليل
ازرع خيرك ارعى ف طيرك ** عمر الانسان فينا قليل
داوي بروحك كل جروحك ** اللي بيخدع يبقى ذليل
خلي كلامك نبع سلامك ** زي الغنوة أثرها جميل
إيّاك همك يحرق دمك ** اغسل حزنك جوا النيل
امسح دمعك ولع شمعك ** خلي طموحك فيك قنديل
للخير بادر شرّك غادر ** افتح قلب لكل زميل
شيل من جوفك أوهام خوفك ** ازرع شجر الحب بديل
افرح عيش.. افرد ريش ** كل العمر نهايته رحيل
خلي البسمة ضحكة ونسمة ** يصبح حب الفرح طويل

.....

أجمل بلاد الكون

أجمل بلاد الكون ** بلد الهرم والنيل
لو دمعة يوم بتكون ** عني الوجع بتشيل
بيها الفؤاد مسكون ** عشق ف عيوني دليل
فداها روعي ياناس ** والعمر يبقى قليل
جوه الفؤاد والنني ** وانا جذري فيها اندفن
منها الغرام ولا مني ** بعادها الحياة دي عفن
عارف وحالف إنني ** من خيرها كفي حفن
ومهما تقسى يا ناس ** يكفيننا منها الكفن
مهما بلاد غيرها ** تديك سكن أو عش
تسمع غنى طيرها ** قلبك جناحه يهش
راضعة الجينات خيرها ** والزاد ولو كان مش
امتي حنان الأم ** يصبح خداع أو غش
بعد الفؤاد مروجوع ** واللهفة تكوي بنار
نعطش حنين ونجوع ** ذكرى الدموع أنهار
روح الغريب ف رجوع ** حلمه في ليل ونهار
ليها الخلايا تحن ** كانت قبور أو دار
مركب قدرنا سوى ** لحنى لغناكي وتر

لو تاه في يوم الهوى ** قلبي يجس الأثر
حضنك لجرحي دوا ** والعش لجناحك ستر
كل اللي ساب سكتك ** جوه الدروب اتعتر
حضن الأمان والدفأ ** حب الوطن م الدين
بعدك بنلقى الجفا ** بتبني وليه هادّين؟!
نقسي وفؤادها عفا ** إيدها حنان مادّين
طوق النجاة حبلها ** نمسك وفيه شادين

.....

الصمت

الصمت يمنع عتب
ورث بكنوز و انكتب
كثر الكلام لو فاضي
يفتح جراح للماضي
يجلب خلاف ومشاحنة
ونفوسنا تصبح شاحنة
دا الصمت ليها دوا
وعزول ما يلقي ملام
صمت الرجال هيبة
يمنعنا م العيبة
وان زاد الكلام عن حدّه
يمسح يكون عادم
لو بُوذ الرطيط سدّه
امتى يكون نادم؟!
والحرف لمّا استوى
نُطق الحكيم دا علام
دا الرغي والثرثرة

ينفخ غبار الثرى
عَبَّي في كوب فضة
غلطة لسان عضه
أصل السكوت من ذهب
يطفي اشتعال الذهب
عن نار يحوش الهوا
نلقى الهدوء وسلام
أصل الكلام حرفه
الكلمة حياة أو فنا
خلي السكات نايب
نادر تكون عايب
واللي كتير رطاط
سايب لسان فطاط
سكين بشفرة اتلوى
والحبكة تكون أفلام
ناس في الحمول قالوا
ع الصمت وصُّوا وقالوا
وزن الكلام معيار
طلق اللسان كعيار

يعمل صنيع و عمايل
يهدم يا يعدل مايل
تسلم خطاوي القدم
والعثرة تبقى كلام
لو نطق كان في محله
فك السكوت حله
قالوا اللسان دا حصانك
إن صنته يوم صانك
من غير لجام جرّك
إن سيّبه هاضرك
راحين تتوهوا سوى
وانت اللي تجني ألام

.....

الحب اللي مصبرنا

انتي الحب اللي مصبرنا
وانتي ف عز العتمة النور
انتي الضحكة اللي بتشفينا
وانتي النبض العايش فينا
إيد حنيّة بتمسح دمعي
وانتي ف لحظة حزن سرور
مهما عيونك تغفل عني
قلبي بيهتني لو تتهني
لجل حياتك شمس بتطلع
نهر حنانك يروي البور
حضنك ضلة وشجر الزينة
تبكي الدنيا ان كنتي حزينة
فيكي السر الأزلي الكامن
وعيون موسى وجبل الطور
انتي الدنيا وقلبي عايشها
لجلك روح العمر حايشها
مهما يغيب الطير يرجعك

أخرك شوية بكأ



مهما يلف بعيد ويدور
مهما الليل يبشّد ستايره
فوق دربك نمشي وبنسايره
تاج فوق راسي بيه نتفاخر
وانتي ف سكة عمري بدور
مين ف بلاد الدنيا دي زيّك؟!
ضلمة العالم من غير ضيّك
لمّا تاريخك يوم يتكلم
مين يشبه لبنات الحور؟!
مصر القلب الحاضن لنا
هي الشط وهي المينا
بيصونها المولى ويرعاها
واللي بيكره مصر يغور

.....

البتاعة

بالبتاعة ليها فيديو كل ساعة

لابسة إغراء للإثارة

عرض معمول باقتناع

نحت بارز بالدهون

لجل شهرة كتير يهون

ليها خطوة ع الإيقاع

تحت فوق ع القمة قاع

م الرشاقة والأناقة

للورا تكبر تمد

بالبتاعة ليها فيديو كل ساعة

بالمزق و المحرق مين يعاين م الزباين

ضد فقر تجيب مناعة

بارتفاعها وانخفاض

دخل من يوتيوبها فاض

ع المجلة تكون أفيش

م الليونة عظام مافيش

كيرفي متموّج زوايا

أخرك شوية بكا

ف الدعاية ما ليها ند
بالبتاعة ليها فيديو كل ساعة
لحم فرجة للجميع
ديه موضة تصوير مشاعة
دي بالونة وتحفة قيمة
لقطة منها بفيلم سيما
لحم متضحي بصاحبه
اللي شافه يسيل لعابه
باعترازها واهترازها
لو تقع على بيت تهد

..

بالبتاعة ليها فيديو كل ساعة
لفظها ع الودن خادش
لمّا تتكلم اذاعة
بصوا شوفوا تاريخها حافل
ف البرامج والمحافل
كل يوم تطلع بفلتة
عاملة فيها نجمة سالتة
بعد ما جلدك يكرممش

بكرًا تنفخ أو تشد
بالبتاعة ليها فيديو كل ساعة
ليها جمهورها المراهق
كل يوم تعمل إشاعة
مرّة شيخة بتبتهل
وبعد غيبة بصوت تهل
وشها للخلف عاكس
والعيون تغمر تعاكس
واحدة نسبة ف المشاهدة
ألف جائزة تقول تعد
بالبتاعة ليها فيديو كل ساعة

.....

نص القلب

أنا نص القلب وهبتولك
والنص الثاني باعيش بيه
طب ليه بتبيعه بقساوتك
وتبيعه ف لحظة لعزالي
وتفاصيل فيه؟!
طاب قلبي العاشق ايه ذنبه ع الحب اتلام
محتاج لحبيبه يكون جنبه يحيله ألام
لو يجري وراك ويندهلك ** تقسى وتجافيه
ده انا كنت فارشلك أركانه
وطردت عشانك سكانه
واديتك عقد التملك
دا حبيبي المالك وبخطري
ولا حدش يسكن بعديه
يا ليالي الفرحه المتعاشه وشموع بتقيد
تحويشه العمر المتعاشه بالقرب تزيد
لو تبعد يوم عن دنياتي هلاقيها سراب
العزف يخاصم في نياتي والمر شراب

وحياتي هتصبح بلا معنى
 والمغنى نشاز كالعدودة ** و العالم تيه
 يا خطاوي بتمشي على دروبك..ولا يوم بتمل
 يا شמוש بتضلم لغروبك..ولا نجم يهل
 لو قلبك يبعد ويسافر ينساني الفرح
 ده انا روحي مع الكون تتنافر وتعيش ف الجرح
 و النبض الساري في عروقي
 وملامح طيفك في شروقي
 لو فكر يهرب يتدارى ** طاب فين هلاقيه ؟!
 يا نهر اتجدد في حياتي من بعد ما جف..ارويني
 يا حضن الراحه اللي لقيته من بعد اللف..اوويني
 ده الورد معطر من ريحتك
 بستان اشواقي لو يدبل
 من نبع حنانك هاسقيه
 دا انا نص القلب وهبتلك
 والنص الثاني باعيش بيه
 فياريت ترعاه كدا وتصونه
 وبلاش بالقسوة تعبیه

.....

الخط الكوفي

بالخط النسخ وبالكوفي
اكتبك اسمك فوق نجمة
وارسمك صورتك ف كوفي
وبحبر العشق المتعق ** و حبال الود المتوتق
وبلون اطياف كل لغاتك
انقشك لوحتك بحروفي
بالخط النسخ و بالكوفي
على نغمه كروان بيغني ** على دقه قلبي المستني
افرشك دواوين سجاده
وتخطي ع الدنيا تطوفي
بالخط النسخ و بالكوفي
تفاعيل الوزن الرنانه ** تمسح دمعاتي الأنانة
على بحر طريقنا المتكامل
تلحين اغانيكي بدفوفي
بالخط النسخ وبالكوفي
برموز سحريه وطلاسم
وعطور من ريحتك وبلاسم
راضي علي الطهطاوي

هخاطهم على ضحك شفائيك
و هيطلع نغمي و معزوفي
على الوش الناصع من ورقك ** بالمسك النازز من عرقك
هاكتب قواميس العشاق
بالسر الغامض والصوفي
بالخط النسخ وبالكوفي
لو ميت مليون كلمة ولهجة ** اسمك هيفوح ع الكون بهجة
وسطورك هاغزلها غناوي
وهتبقى عيونك موصوفي
براويز على صورتك شفافة ** كمشاعر روعي الهفافة
لو جالك شك ف رسوماتي
طاب بصي باحساسك شوفي
بالخط النسخ وبالكوفي
هاكتبلك اسمك فوق نجمة
وأرسمك صورتك بحروفي
بالخط النسخ وبالكوفي.

.....

انزل .. شارك

مصر تنده قوم وشارك ** قوللهم دا المصري مين
الشهيد خاض المعارك ** لجل ما نرفع جبين
وانت دورك جوه لجنة ** اوعي يوم بيه تستهين
مصر تنده قوم وشارك ** قوللهم دا المصري مين

..

مصر لَمَّا ف يوم تنادي ** كلنا واقفين صفوف
لجل خير ينفع ولادي ** حبر لجنة يزين كفوف
لَمَّا دورنا يكون إيجابي ** خير عمار حتمًا نشوف
مصر لَمَّا في يوم تنادي ** كلنا واقفين صفوف

...

قول رأيك ف اللجنة وعبر ** لبي الدعوة بخطوة ومد
زي بطل ف أكتوبر كبر ** إيد ف الإيد هنكيد الند
واجب قومي عليك وعليًا ** بعزم وهمة لبعض نشد
قول رأيك ف اللجنة وعبر ** لبي الدعوة بخطوة ومد

.....

لا للإدمان

عايز تعيش في هدوء وامان
وتلقى معاك الصحة سلامه
ابعد يا ابني عن الإدمان
آخر السكه ندم و ملامه
او عى شيطان يغريك وتقرب
خطوة موت وما ليها رجوع
ولأ صديق يدعيك وتجرب
تخريب مخ وحال موجود

.....

لحظة ضعف لموت هتجرك..
مين قال لك بيحل مشاكلك؟!
ليه تستسلم للي يضرك؟!
بص وشوف جيبك مع شكك

...

مين مدمن عاجبك كدا حاله?!
مهما يقول دا مزاج متكيف
ضيّع سمعة بيت مع ماله

أخرك شوية بكا

وتلقى الكبد معاه متليف

.....

اوعى تخش التوهة الدائرة

إياك ع الفاسد تتلم

تلقي دماغ ويَّاك كده حائرة

ايه بس اللي خدوه م الشم ؟!

اخر السكة ندم وملامة

.....

الشرقية

من كل عين كده مرقية ** يا بلادي حلوة يا شرقية

باعة المحبة لكل الكون ** ألفين رسالة وبرقية

يا تاريخ عرابي وأثار تقول..

يا غنوة وبطولة بصهوة خيول

لو ضيفنا جالنا هيشوف رجالنا

طيبة وشهامة تبهر عقول

.....

من كفر صقر فاقوس قنايات

بلبيس يغني تاريخها نايات

مشتول يا درب وههيا كبير

رحلة مسيح ولموسى آيات

.....

أولاد يا صقر قرين حسينية

بقلوب طيابة وعقول غنية

خضرة ونضارة عطر الحضارة

منيا بقمحك بالخير هنية

.....

اولاد حماد وعاشر صالحين

وحليم نجوم فن وتلحين

عالم و مِيَّه ..يا ابراهيمية

من ماضي وبكرة لوقت الحين

من كل عين كده مَرْقِيَة ** يا بلادي حلوة يا شرقية

باعته المحبة لكل الكون ** ألفين رسالة وبرقية

.....

أسيوط

ونقول نغني أسيوط بلدنا ** النيل راويها فيها اتولدنا

يا نجم عالي ف صعيد يلالي
وتاريخ جدودنا وبستان ولادنا
ديروط وصدفة شوفوا القوصية
و هوى البداري بلسم رطيب
لو موج يجيها بيقول عصية
وعليل يزورها يشفي ويطيب

ونقول نغني أسيوط بلدنا ** النيل راويها فيها اتولدنا

يا نجم عالي ف صعيد يلالي
وتاريخ جدودنا وبستان ولادنا
فتح وغنايم يا شهيد سيوطي
يا ميت مراحب لو ضيفها جالها
جامعة وقناطر يا منفلوطي
وفرنسا تحكي بعزة رجالها

ونقول نغني أسيوط بلدنا ** النيل راويها فيها اتولدنا

يا نجم عالي ف صعيد يلالي

وتاريخ جدودنا وبستان ولادنا
ابو تيج يا فرغل والدير و بابا
ابنوب دركنة وساحل سليم
خضرة وجناين وقلوب طبابا
وياسين تهامي وجمال زعيم
ونقول نغني أسيوط بلدنا ** النيل راويها فيها اتولدنا
يا نجم عالي ف صعيد يلالي
وتاريخ جدودنا وبستان ولادنا

.....

البحيرة

يا بحيرة يا عطر فايح ** جوه أرض الطيبة مصر

فخر مجدك ضي لايح ** فاق جمالك كل حصر

ده البحيرة الحلوة ديه

كوم حمادة نقول نعيد

شبراخيت للمحمودية

من زويل لحجر رشيد

.....

من عهد جدود رحمانى يجود

نطرون نوبارية وقناطر

مطامير دا اسود فريزر مفقود

اهل دلنجاتنا يا خير ماطر

.....

ادهم شرقاوي ابو الحمص

بتاريخ يا بحيرة بنتفاخر

وطبقنا دا واحد شيخ قمص

ونسيمنا هوانا سوبر فاخر

.....

كفر الدوار حوش عيسى عمار
ف الصحرا نضارة يا ناس طالعة
وسنابل ضاحكة ف وش نهار
شوف ادكو حضارة وميت قلعة
يا بحيرة يا عطر فايج ** جوا أرض الطيبة مصر
فخر مجدك ضي لايح ** فاق جمالك كل حصر

....

بنت الأصول

الشمس قَدَّاحَةٌ ** والغنوة صَدَّاحَةٌ
بنت الأصول والناس ** متكونش ردَّاحَةٌ
للحبر ختَّامَةٌ ** والضلعة عتَّامَةٌ
بنت الأصول والناس ** متكونش شتَّامَةٌ
دا الورد لون هایل ** تصبر تكون نايل
والبنت لو عُوْجَةٌ ** ف السكة تتمايل
نمشي ونتأمِّل ** والخطوة تتكَمِّل
بنت الأصول والناس ** مع جوزها تتحمِّل
ميت قصة وحكاية ** لو عينها بكاية
بنت الأصول والناس ** متكونش شكَاية
السن والشيبة ** والقيمة والهيبة
بنت الأصول والناس ** ما بتعرف العيبة
للفرحة شمعتها ** تبرق بلمعتها
بنت الأصول والناس ** كالعطر سمعتها
متصانة كالذَّرة ** طاهرة الجذور حرة
بنت الأصول والناس ** متجبش يوم جُرة
بطيخة شمَّامَةٌ ** ده السكة لَمَّامَةٌ

بنت الأصول والناس ** متكونش نَمَامَة
دا الولعة شَطَّاطَة ** والكورة نَطَّاطَة
بنت الأصول والناس ** متكونش رَطَّاطَة
اربط كدا و قرط ** لو إيدها تتخرط
بنت الأصول والناس ** في شرفها ماتفرط

.....

الحب مش بالعافية

الحب دا مش بالعافية ** ولا عمره بيبقى جمایل
دي مشاعر شوقنا الدافية ** وبيعمل فينا عمايل
الحب دا ليه علامات ** لو يعزف على أوتارك
هيقرب ف المسافات ** تسهر ليلك ونهارك
ع الوش بيان وعيونك ** ويشعل لهفة نارك
ويشعل لهفة نارك

لو قلبك يوم بيه حس ** إشارات الحب تجيك
لكن لو إعجاب بس ** ولا شيء هياثر فيك
حبك لو يسكن قلبك ** هيبان وهيظهر ليك
هيبان وهيظهر ليك

لو قلبك حس بغيرة ** سرحان مشغول كده بالك
واللهفة معاك والحيرة ** والفكر مغير حالك
يبقى تدور على نفسك ** ده الحب مؤكد جالك
دا الحب مؤكد جالك

الحب إن مسك طيفه ** احساس صعب تخبيه
لو دق وزارك ضيفه ** افتحله ورحب بيه

دا الحب ان سابنا وراح ** مين فينا يا ناس يلاقيه؟!

أحرك شوية بكا

مين فينا يا ناس يلاقيه؟!

هتطير وتروح على فوق ** وبياخدك عالم ثاني
وتدوق في لهيب الشوق ** تحسب عمرك بثواني
وتحب الدنيا بحالها ** وتقول من بحرہ رواني
وتقول من بحرہ رواني
الحب دا مش بالعافية ** ولا عمره بيبقى جمایل
دي مشاعر شوقنا الدافية ** وبيعمل فينا عمايل

.....

الغدارة

وف لحظة تحس ان الدنيا دي ملك إيديك
وف نفس اللحظة تلاقيها ضحكاته عليك
وتشوفها بترقص تتمايل على واحدة ونص
و دموعك فجأة بتتسرب من نين عنيك
وف لحظة تحس ان الدنيا دي ملك إيديك

...

وساعات بتفرح كدا قلبك وتقيدها شموع
وتغني رومانسي على كوميدي والصوت مسموع
لكن غدارة ولا تعرف ابدأ أصحاب
دي ف عز الفرحة تلاقيها أحزان ودموع
وساعات بتفرح كده قلبك وتقيدها شموع

...

أهي دنيا بتلعب كده بينا بالطول والعرض
بتلطف فينا ودّارة ومصيرنا الأرض
وف سكة توهة بتغويننا محناش داريين
دايمًا تغرينا بزخرفها وبننسى الفرض
أهي دنيا بتلعب كده بينا بالطول والعرض

أخرك شوية بكأ

..

دي عجيبة الدنيا ما نفهمها زي الألباز
و سراب أو هام بيزغللنا دي بخار أو غاز
وتحايل فيها وبتعانذك ولا يوم بتلين
ولا تبقى ف يوم ابدأ طوعك و إليك تنحاز
دي عجيبة الدنيا ما نفهمها زي الألباز

...

بوشوش الدنيا دي كتيرة ميت ألف ولون
تنفخ أصحابها وتخدعهم وتفش بالون
كالكرة ف ملعب وبتجري والوقت يمر
وف لحظة بتطلع اوفسايد ويضيع الجون
بوشوش الدنيا دي كتيرة ميت ألف ولون

.....

طب ليه ؟!

طب ليه انا كل ما اقرب ** تجري بعيدي وتتهرب؟!
وتسييني ف شك وحيرة ** وظنون جواي تتسرب
لو كل الكون يندهللي ** من غيرك انا بتغرب
طب ليه انا كل ما اقرب ** تجري بعيدي وتتهرب?!

...

الحب دا مش بالعافية ** ولا عمره يكون تمثيل
دي مشاعر لو مش دافية ** القلب ما يرضى يميل
أحاسيسنا تبان وبتظهر ** ف عيوننا بألف دليل
الحب دا مش بالعافية ** ولا عمره يكون تمثيل

...

الحب مافيهش مجاملة ** لو بايع ابعد...روح
دي حاجات بتبان في معاملة ** بلسم بيداي جروح
و كرامتي اكبر من حبي ** مبدأ ببيان بوضوح
الحب مافيهش مجاملة ** لو بايع ابعد..روح

.....

زوجة بتفضفض

خدتَه وهُوَا يا دُوبك حافي
خليت رمشي غطاه ولحافي
بقي بيهيئي ويسخر مني
ويشتم فيا كمان ويجافي

...

أيوا بحافظ ليه على هييته
عمري ما جيت ف أزمة وسييته
ولما الرزق معاه بيضيق
يجي يلومني يا ناس على خييته

..

رغم غلاسته وبخله وجهله
أخدع نفسي أقول ما استاهله
ولأ حماتي يا ناس ونكدها
ولأ مشاكل جارتَه وأهله

...

خايفه يجييلي الموت بالجلطه
واقف بس يا دُوب ع الغلطة

بعد ما يملا البطن ويشبع
بيقول أكلك ناقص خلطة

...

باع الصيغة الحيلة بتاعتي
حتى العُقد وحلقي وساعتي
ولمّا أقول له خف شوية
بيقول هبلّة يا ناس ولسعتي

...

ياما كتير صابرة وبتحمّل
ده أنا قمراية وليه بتجمّل
وكمان يجرح ليّا مشاعري
بس عشان أولادي هاكمل

...

وحاجات تاني يا ناس بيسيبيها
لو هتقولها الست تعيبيها
لمّا أفضفض لأمي تقوللي
لازم بنتي تعيش . ده نصيبيها

.....

محاوطني بسور عالي

وبندهلك بتتعالى
وشاداني بحبل الشوق
ولو بنزل تشدي لفوق
ومُوج بحرك يمرجني
ومش عاجبك كمان حالي
محاوطني بسور عالي

..

ولفاني كما الدائرة
وسايبة الروح كده حايرة
وتلقيني لما تعوزي
وتاخدي كتير وبتحوزي
وبفتحك دروب قلبي
فليه ع السكة مش سايرة؟!
ولفاني كما الدائرة

..

وحارماني من الرفريف
وساكناني مدينة وريف

وليه بردك معدش يهل؟!
ولا نخلك بي طرح ضل
وباسقيلك ربيع وردك
فليه حبي بيبقى خريف؟!
وحارماني من الرفريف
.....

آن الآوان

آن الآوان نمشي ف طريق ** فيه المحبه والأمل

نفتح قلوبنا لبعضنا ** نخلص ونبدأ بالعمل

نلقى الحياه متبسمة ** والحلم في بلادنا اكتمل

آن الآوان نمشي ف طريق ** فيه المحبه والأمل

آن الآوان نفتح ببيان ** والنيه صافيه ف القلوب

نحكي بوضوح عن حلمنا ** وكلامنا هينور دروب

نلقى السعاده المبهجة ** والقلب ع الفرح اشتمل

آن الآوان نمشي ف طريق ** فيه المحبة والأمل

ايه اللي خدناه م الخصام ** غير الجفاوة والجروح

لو قلبنا عن شر صام ** عطر الجنائين راح يفوح

لا دمع هيبان ف العينين ** ولا قلب للحزن احتمل

آن الآوان نمشي ف طريق ** فيه المحبة والأمل

.....

أنا مصري

أنا مصري ومين غيري؟!!

يغني نشيده مع طيري ** وقبل الدنيا ماتفتَح

دا كانت عايشه على خيري

أنا مصري وكل الدنيا تحسدني

ولا يقدر في يوم كاره أنا يكيدني

باحب بلادي وافديها ** مالخونك لو تعاهدني

أنا مصري ومين كدّي ** ولا في الدنيا فيه ندّي

ولا أقبل في يوم واحد ** يعدي ف يوم على حدي

أنا مصري ومين غيري؟!!

يغني نشيده مع طيري ** وقبل الدنيا ماتفتَح

دا كانت عايشه على خيري

أنا مصري وبتفاخر ** وكلمه بقولها م الآخر

تاريخ الدنيا يشهدلي ** تراب أرضي عبير فاخر

أنا مصري ومين غيري؟!!

يغني نشيده مع طيري ** وقبل الدنيا ماتفتَح

دا كانت عايشه على خيري

.....

الأهلى

يانجم يا هيرو ** يا مفرح دائماً جماهيرو

ليه بيقولوا عليه أسطورة ؟!

أصله تاريخ ابداع ف الكورة

دايما رافع اسم بلاده

واخذ أحلى مكان في الصورة

مين هما يا ناس ومين دوولة ؟!

م الدرجة الثالثة للأولى

عاشقين للأهلي وينشجّع

ألقاب بياخدها مع بطولة

أهلي يا أهلي يا نجم يا هيرو ** يا مفرح دائماً جماهيرو

نسر و قمة وأحلى فريق

نادي القرن ومجد عريق

كل مانبقى معاه ونسانده

يلمع نجمه زيادة بريق

أهلي يا فن وذوق وعزيمة

خلا اللعب مبادئ قيمة

برّة وجوا كاس أو دّوري

عمره ما يعرف معنى هزيمة
أهلي يا أهلي يا نجم يا هيرو ** يا مفرح دائماً جماهيرو
بص وشوف ف الكون كام نادي
تلقى الأهلي فريق مش عادي
واخذ أحلى شعار ف الدنيا
رمز كفاح وتاريخ ف بلادي
أهلي يا أهلي يا نجم يا هيرو ** يا مفرح دائماً جماهيرو

.....

المطرب الفذ

أصل الهم دا بيّا وبىكا ** ألف سلامة على المزىكا
هاكتب شعر أنا بس لمين؟! ** هاكتب شهر أنا ليّا وليكا!
شوفوا الفن يا ناس راح فين؟! ** عين راح تنزف ليك دميكا
أصبح خلطة وملطة حقيقى ** أو كوكتيل مطبوخ فابريكا
عشنا وشوفنا الفن الراقي ** هوجة وموجة تهز فىكا
بُص وشوف الألحان رزعة ** فزعة شعور جواك تحريكا
شوف الرقصة مع الإحساس ** ناس هتميل ويّا التهشيك
بحة صوتك دي كروان ** طفح مجاري بدوت تسليكا
زيطه تنطط قرد وفيل ** منها ينخ جمل تبريكا
دا انت حلیم عندك ولا حاجة ** وفريد أطرش فين جنبىكا؟!
لو كلثوم سمعت إبداعك ** قالت ع الاطلاع تعيكا
أو سيد درويش كان شافك ** كان حتما خلاك تشريكا
جابه بياتي مع الزياتي ** جاب "الرسرست" و"كرد" و"سيكا"
عودنا ايقاعنا قالوا وقعنا ** ناي وكمان وجيتار أستىكا
جعر. نعر. مش راح تفرق ** صرخة عنزة وفرخة وديكا
مش محتاجة الشغلة دراسة ** وراثه فراسة مع التلىكا
غنى كمان من غير ترخيص ** مليون حته يا ناس تأويكا

وكمآن تلقى الحظ هيضرب ** وحساب يبقى معاك بالشيكا
انسى يا راضي قصايد شعرك ** واعجن غنوة تكون ترالिका
تطلع سلم مجدك يا ابني ** وابني الاسم شهير فورتिका
تبقى بريمو على اليوتيوب ** تبقى ترند ف لحظة وشيكا
وانسى كمان راضي الطهطاوي ** واكتب اسم الشهرة راضيكا
أصل الهم دا بيّا وبيكا ** ألف سلامة على المزیکا

.....

أمي

هاحكي ايه ولاّ ايه؟!!!
هاحكي عن تعبك في حملي
ولاّ كبدك كان وسادة
ولاّ ترفيسي في بطنك
شغل يهلك ألف دادة
ولاّ دمك لما سال
ولاّ أنفاس الولادة
ولا طول سهرك في ليك
فط قلبك وانخلع
لما شوكة جات في صابعي
عشتي مرجوفة ف هلع
والوش م الخضة انخطف
والدموع سالت عليه
هاحكي ايه ولاّ ايه؟!!!

....

لما باجري في الجنائن
قلبها يحرس يعاين

لَمَّا بِالْعَب فِي النَوَادِي
كُلْ لَهْفَةً وَشَوْقَ يَنَادِي
لَمَّا أَغْضِبَ بِاحْتِدَادِي
قَلْبَهَا يَطْبُطِبُ يَدَادِي
لَمَّا أَسْهَرَ مَرَّةً بَرَّةً
مَنْ قَلَقَهَا عَلَيَا تَزْعَلُ
مَرَّةً تَعْتَبُ أَوْ تَخَانِقُ
كُنْتُ أَحْسَ كَلَامَهَا خَانِقُ
بَسْ بَرَضُو تَرَاضِي فَيَا
بِكَلِمَةٍ حُلُوةٍ وَابْتِسَامَةٍ
يَا ابْنِي بَتَوْغُوشَ عَلَيْكَ
يَا ابْنِي بَتَوْحَّشَ عَيْنِكَ
أَلْفَ حَمْدٍ عَلَى السَّلَامَةِ
طَمَنِي قَوْلَ أَخْرَتَ لِيهِ؟
أَوْعَى يَا ابْنِي تَنَامَ بِجَوْعِكَ
وَلَا تَزْعَلْ مِ الْمَلَامَةِ
يَااااه ..
لَسَهُ فَاهُمْ بَسْ يَا مَهْ
إِنِّي قَلْبُكَ كَانَ عَلَيَّا

وللمحبة ميت علامة
قلب مخلوق للمحنة
واحنا نقسى كتير عليه
هاكي ايه ولا ايه؟؟!!

.....

سيناء

أنت عارف يعني سينا ** تبقى إيه بالنسبة لينا؟!
يعني ذرة ف تاج بلادي ** حتة جوه القلب فينا
لو هنحكي عن تاريخها ** أعلى توب أمجاد كاسينا
أرض مقدس ترابها ** عطرها الفايح بنيينا
من جبال الطور تجلى ** نور إلهي بيحتوينا
أوعيون موسى الشهية ** نبع متجدد راوينا
مريم العذراء دي خطت ** فوق ترابها المرمرينا
كل حبة رمل تشهد ** جاية من أعماق واديننا
لحظة عن أحضاننا غابت ** خدها غاصب بيعاديننا
هب جيشنا بكل عزم ** ألف موت لو بيناديننا
راح نجيب النصر فوراً ** والعبور صار عيد وزينا
جيش بلدنا من ولادنا ** وأنت مين يا ابن الذين؟!
جيش بلدنا ربي صاينه ** بشرى جات له من نبينا
ألف ميت تعظيم سلام ** للي فوق جبهة حامينا
أو شهيد بالعمر ضحى ** لجل تحيا لمصر سينا
لجل تحيا لمصر سينا

.....

هدية عيد الحب

قولي يا فالحة جابلك إيه ** ف عيد الحب القال عليه؟!
جابلي القشطة مع البسبوسة ** وصُبح وليل يديني البوسة
وقاللي ف نن العين ننوسة ** وبس كفاية عليا رضاه
وجابلي الورد ف أغلى بوكية
جابلي بصل وعمل تقلية ** وطبخ لحم خروف م اللية
وكتب أحلى قصيدته دي فياً ** ربي يصونه من الحساد
وشفت الحب كمان ف عينيه
جابلي الجيبة الحلوة الموضة ** وأحلى ستارة معاه للأوضة
وجاب عيالنا كمان م الروضة ** وجابلي تايرر بأحلى موديل
و باقة شاحنهما بألف جنية
جابلك إيه يا بنت يا مُورَة ** جابلي فستان وياً بلوزة
وعمره ما سابني ف حاجة وعوزة ** ويقول بس حبيبتي اتمني
بُطّي وملطي فسيخ وبانية
جابلك إيه ف العيد يا حمامة ** جابلي كناريا وياً يمامة
وجاب بطيخة مع الشمامة ** وقاللي حبيبتي راحتك راحتي
وغاسللي المطبخ بإيديه
جاب سخان ومعاه أنابيب ** وملا البيت أحمر دبايب

من حنيّة قلبه باطيب ** وبيتمنى بس رضايا

طرحة وشال بُرُنس و جالية

جابلِك ايه بت يا موكوسة ** جابلي سبانخ قلقاس كوسة

وعَدَل صورة كانت معكوسة ** وشنطة ماركة محدش جابها

كومبيلزون آندر سوتونيه

جابلِك ايه يا بنت يا هبلّة ** جاب أيفون وبيانو وطبلّة

وقال شايفك ف عيوني كعبلة ** وجابلي الفاكهة كمان مستورد

والكافيار والتونة فيليه

جابلِك ايه يا حلوة يا بطّة ** جابلي بيتزا بفلفل شطة

وقلبي معاه بالرمش اتغطى ** ولا عمره قصّر ويّايا

طب عزالي بتسأل ليه؟!

جابلِك ايه يا بنت يا لولو ** اللي اتجاب مقدرش أقولو

وسهرنا ع اللحن الصولو ** وعزفلي على دقة قلبي

وع الزيرو العربية كوبيه

جابلي يا اختي الديق من ديله ** وبطل دخان هادد حيله

ورايح شغلّه وشادد حيله ** وكمان جابلي لبن عصفور

وبيعلمكوا الحب دا كيه

جاب تسويقتي معاه كالعادة ** ورش العطر سرير ووسادة

طاب ليه بس الناس متكادة ** وحلفلي ما صدقت لقيتك

وعشاني حَفِيت رجليه
 جابلك ايه يا بنت يا عزة ** جابلي عصير والترمس مزة
 وموسيقى الأشواق دي هزة ** وقضينا السهرة بندندن
 والرقصة الحلوة دي باليه
 محشي وسادة جابلي البيسكي ** وكلنا العيش السخن فريسكي
 والألوان تشكيل أرابيسكي ** وبنينا الأرواح متناغمة
 وحلمي بيكون مني إليه
 جابلي الدوم والتمر وسوبيا ** وعزمني على عشوة لوبيا
 ومعاها بانسي زعل والفوبيا ** ويا دوب فُتْنَا عند الصايغ
 جابلي العُقد اللولي كُوليه
 جابلك ايه يا بنت يا سامية ** جابلي خيار وفاصوليا وبامية
 وجابلي كنافة وبلح الشَّامِيَّة ** وبالفسحة الصيف مواعدني
 وحجزلي ع البحر شاليه
 قولِي يا فالحة جابلك ايه ** ف عيد الحب القال عليه؟!

.....

الفرفورة والصعيدي

فرفورة ف مرة قابلتني ** وقالتي صعيدي ولا إيه؟!
قلتله صعيدي وراجل جد ** طاب مال الحلوة بتسأل ليه؟!
فقالتي يا حلوة شنبك ** والشال والعمة السواريه
راجل واهو طبعك كده حامي ** والعافية بتبان ف إيديه
وسمارك ع الوش بيلمع ** ووسامتك على ميت كوبليه
وبتكسب عرقك بجبينك ** ولا تعرف سوسن وجانيه
وخطيبي عامل كالفرخة ** بتبربش ف الشمس عينية
ولا بسلي سلاسل على صدره ** وعامللي خفافس وكاريه
والجينز بتاعه المتقطع ** ناقص خلخاله ف رجله
حظاظه أساور ولبانة ** وشويه هيلبس سوتينيه
ماشي بيتمايل على خيبته ** ويقوللي دا موضه وباليه
ع القهوة ونادي بيتسكج ** من مامته بيستنى جنيه
وصحابه تهزر ويايا ** ويقوللي دا عادي وأوكيه
ولا عنده شهامه ولا غيره ** وكلامه مياصة وإفّيه
رديت وقلت يا بُوووي ** ايه غاصبك طاب بس عليه؟!
فقالتي إيه رأيك أسييه ** وتاخذني الخدمة يا بيه؟!
دا صعيدي انت وعاجبني ** وأنا هاقتع ماما وبابّيه

ومعايا الشقة وعريه ** وميراثي الفيلا وشاليه
قلت لها غوري دا مراتي ** تحفر على روعي قبريه
جيانني من أنهى مصيبة ** دا أنا أم عيالي ف قلبيه
.. **

جحود الانسان

ربك خلا الدنيا جميلة ** ونور كل الكون بسناه
وخلق آدم علشان يعبد ** من كل احتياجاته غناه
سخر كل الخلق عشانه ** وفتحله ف الصخر قناه
لجل ما يزرع فيها ويحصد ** واداه كل اللي اتمناه
سر مصانع ويا قصور ** ويعينه دايما في بناه
وبعتله التعاليم والدين ** وخلقله من حوا ضناه
خلا عياله تبقي خليفه ** واللي يطيع فيهم يا هناه
لكن بس الإنسان جاحد ** رغم النعمة بنبقى جناه

.....

قيد العشق

كل لحظه ف بعدي عنك ** كل لمحّة تاخذني منك
قلبي يلقي الكون فراغ ** و روعي بتعيش اختلال
والخريطة تضيع دروبها ** والشموس تنده غروبها
وليل حياتي يصير طويل ** والهموم تصبح تلال
والوشوش يبهت بريقها ** و ألف غيرة يزيد حريقها
والسهر يسكن جفوني ** والقلوب تعطش دلال
دنيا زايطة كتير بناسها ** روعي مشتاقه لونسها
وحدتي تحاوط كياني ** غربه ف الكون وانعزال
كل عزفي بيبقى سولو ** والنشاز فارض وصولو
ع الغصون الزهر يبكي ** والوجع هزّ الجبال
لو تغيب الضحكة جفت ** والنجوم عن ليل تخفت
دا انت تغريده شروقي ** بسمتك تشفي اعتلال
دا الأمان بلقاه بجنبك ** لو تسبيني هاموت بذنبك
ف الشتا بتكون دفايا ** وانت في الحر الظلال
نفسى أتعود غيابك ** منتظرش ف يوم إيابك
فك ربطة روعي فيك ** ألقى من قيدي انحلال

لو فتاوى العشق دارية ** اني روحه ف روعي ساريه

كانوا بالتأكيد أقرأوا ** إنني هجرانك حلال
قلبي كان ودّع مجالك ** أصله نادم إنو جالك
لجل جفوة بين حبابب ** تنقطع م الشوق حبال
كل مرة أقول هاسيبك ** طير يا قلبي وشوف نصيبك
ألقي روعي فيها نبضك ** ساكن القلب احتلال

.....

لولا الجيش ولولا الشرطة

لولا الجيش ولولا الشرطة
كنا لقينا بلدنا دي فرطه
فوضى حياتنا و غاب أو ميغة
والمجرم لهجاته بليغة
والفارد جناحات بالقوه
بيبلطج ع الناس وفتوة
و بيخطف من بنتك صيغه
والعصابات راح تصبح أورطة
لولا الجيش ولولا الشرطة
كنا لقينا بلدنا دي فرطه
كنا لقينا نسيجنا اتشتت
و الاعداء عايزين نتفتت
يخدونا ف توهه و دوامه
نتقسّم كعجينة الطورطة

...

لولا الشرطة ولولا الجيش
كنا لقينا بلدنا في طيش

و الخطوة ف سكة متاهات
نصرخ م الأوجاع ونهات
شوفوا بلاد كثير دكوها
زي العقد و خيط فكوها
كل فصيله رايحه في ناحيه
تزحف داعش فيها وتحيا
بص بعينك غرب و شرق
سلب ونهب و خرق و حرق
حقتوا الفتنه في ضخ عروقهم
لاجل ما يمنع الشمس شروقهم
ويعيشوا في هوان ومذله
لاجئ يطلب قوت او عيش
لولا الشرطه ولولا الجيش
كنا لقينا بلدنا ف طيش

.....

ولا شيء يستاهل

ولا شيء ف الدنيا بيستاهل ** من عينك دمعاية تسيل
هتضيع أيامك بالساهل ** لو تاخذ ع الهم تشيل
إيه خدنا منها الأحزان؟! ** دا العمر قصير قليل
ولا شيء ف الدنيا بيستاهل ** من عينك دمعاية تسيل

Try to smile .try. try.

Forget tears.. forget pain.

only for you Skies rain.

all birds with you sing.

bells of happiness ring.

let your saddness die.

try to smile .try. try.

ولا شيء ف الدنيا بيستاهل ** من عينك دمعاية تسيل
هتضيع أيامك بالساهل ** لو تاخذ ع الهم تشيل
إيه خدنا منها الأحزان؟! ** دا العمر قصير قليل
ولا شيء ف الدنيا بيستاهل ** من عينك دمعاية تسيل

Try to smile. try .try.

Never Let Your Heart cry.

your rope of hope is long.

Be strong ..sing a song.

let your mood be cool and high.

try to smile .try .try.

.....

يابن الإيه

يابن الإيه يا ابن الإيه ** مالك شايف نفسك ليه؟!
يعني مافيش زيِّك ف الدنيا ** اللي القلب هيجري عليه؟!
ولاً عشان حلو وأمر ** تعمل فيها علينا مغرور
خليك واضح زي طبيعتك ** انسان طبيته تبان ف عنيه
يابن الإيه يا ابن الإيه ** مالك شايف نفسك ليه?!

..

خف شوية يا عم ورُوق ** وبلاش فيها علينا تسوق
طاب ليه ماشي كدا متأفور؟! ** من أوهامك اصحى وفوق
دا الحلوين ف كل مكان ** منتاش روميو السوبر مان
مين قالك دايبين في دلالاتك ** ولا القلب عليك مدلوق
خف شوية يا عم ورُوق ** وبلاش فيها علينا تسوق

.....

إيه يجرالي

متخيل إيه راح يجرالي؟! ** لو تبعد عني ف يوم تمشي
مش رايح تأثر في مشاعري ** ولا قصفة شعرة من رمشي
انا عامله حسابي على غدرك ** عارفك مكار
ولا روعي هتزعل على هجرك ** ولا عين تحتار
دا انا ميت مليون تطلب ودي ** والقلب ينقي ويختار

..

متخيل إيه راح يجرالي؟! ** لو تبعد عني ف يوم تمشي
لو شاري أنا عمري مابيعك ** واصونلك ودك و اراعيه
بس اللي يفكر يجرجني ** من قلبي في الحال أمحيه
واكسر من بعده ميت قلله ** ولا لحظة راح افكر فيه

..

متخيل إيه راح يجرالي؟! ** لو تبعد عني ف يوم تمشي
فاكر إنّي ف يوم هاندهلك ** ولا هابعت ف اليوم ميت رنة
ولا من حزني عليك انا هاهلك ** ولا اقول لك أرجوك تستني
سبيتك أيوا خلاص ونسيتك ** قلبي ارتاح بعدك واتهنى
متخيل إيه راح يجرالي ** لو تبعد عني ف يوم تمشي

....

الشاعر في سطور

- الشاعر راضي علي الطهطاوي
- سوهاج .طهطا ..عرب بخواج..مواليد ١٩٧٨
- عضو اتحاد كتاب مصر
- ليسانس الآداب والتربية قسم اللغة الانجليزية
- دبلومة مهنية دبلومة خاصة بالدراسات التربوية...
- باحث ماجستير جامعة المنيا.
- معلم أول أ ثانوي لغة انجليزية .
- عضو نادي الأدب بطهطا.
- محاضر مركزي بوزارة الثقافة.
- صفحته على فيس بوك

<https://www.facebook.com/profile.php?id=100007943809058>

صدر له

- ديوان / همسات القلب - شعر عامية ٢٠١٠ .
- ديوان / همسات الروح - شعر عامية ٢٠١٠ .
- ديوان / همسات انسان - شعر عامية ٢٠١٠ .
- ديوان / الضحك الصيني المستورد - شعر عامية ٢٠١١ ديوان /
- دموع قلم - شعر عامية ٢٠١١ .

- ديوان / مازالت الضحكة في جيبى شعر عامية - ٢٠١١ .
- ديوان / بحار بلا مجداف - شعر عامية ٢٠١١ .
- ديوان / شعاع جوا حيطان الضلمة - شعر عامية ٢٠١٢ .
- ديوان / ومازال الحلم يحبو - شعر عامية ٢٠١٢ .
- قاموس في اللغة الانجليزية... القاموس المتناغم ٢٠١١ .
- ديوان / فنجان القهوة اللي بيضحك - شعر عامية ٢٠١٨ .
- ديوان / بكاء قصيدة - شعر فصحي ٢٠١٨ .
- ديوان / ضحكة فوق وش الضيّ - شعر عامية ٢٠١٨ .
- ديوان / حبة مشاعر ع الورق - شعر عامية ٢٠١٩ .
- حاصل على عدة جوائز وشهادات تقدير من كثير من المحافل الثقافية.
- له مداخلات ولقاءات إذاعية وتليفزيونية عديدة.
- له عديد من الأغاني على اليوتيوب .

.....

الفهرس

م	القصيدة	الصفحة
١	بطاقة الكتاب	٢
٢	الإهداء	٣
٣	القصيدة العجبية	٤
٤	الصعيدي	٧
٥	الطالب الفاشل	٨
٦	ماكياجها أوفر	١٠
٧	أخرك شوية بكا	١٣
٨	فينك حبيبي !؟	١٦
٩	اليتيم	١٨
١٠	كنت مغفل	١٩
١١	بحب الدراسة ياماما	٢٠
١٢	البنت الأمور الحلوة	٢١
١٣	لو نويت	٢٣
١٤	إنتي لوحدي	٢٥
١٥	دنيا بلاستيك	٢٩
١٦	اللي اتعود يضحك	٣٢
١٧	نتحمل عشان مصر	٣٤
١٨	واتقابلنا	٣٥
١٩	حلم السنين	٣٦
٢٠	نصيحة محبة	٣٨
٢١	أجمل بلاد الكون	٣٩

م	القصيدة	الصفحة
٢٢	الصمت	٤١
٢٣	الحب اللي مصبرنا	٤٤
٢٤	البتاعة	٤٦
٢٥	نص القلب	٤٩
٢٦	الخط الكوفي	٥١
٢٧	انزل ..شارك	٥٣
٢٨	لا للإدمان	٥٤
٢٩	الشرقية	٥٦
٣٠	أسيوط	٥٨
٣١	البحيرة	٦٠
٣٢	بنت الأصول	٦٢
٣٣	الحب مش بالعافية	٦٤
٣٤	الغدّارة	٦٦
٣٥	طاب ليه ؟!	٦٨
٣٦	زوجة بتفضفض	٦٩
٣٧	محاوطاني بسور عالي	٧١
٣٨	آن الأوان	٧٣
٣٩	أنا مصري	٧٤
٤٠	الأهلي	٧٥
٤١	المطرب الفذّ	٧٧
٤٢	أمي	٧٩

م	القصيدة	الصفحة
٤٣	سينا	٨٢
٤٤	هدية عيد الحب	٨٣
٤٥	الفرفرة والصعيدى	٨٦
٤٦	جحود الإنسان	٨٨
٤٧	قيد العشق	٨٩
٤٨	لولا الجيش ولولا الشرطة	٩٠
٤٩	ولا شئ يستاهل	٩٣
٥٠	يابن الإيه	٩٥
٥١	إيه يجراالى	٩٦
٥٢	الشاعر فى سطور	٩٧
٥٣	الفهرس	٩٩